

Զի եթէ վասն բազում մեղաց մերոց եւ անօրէնութեանց առ ժամանակ մի թողեր զմեզ, դարձուցեր զերեսս Քո ի մէնջ եւ տրամեցուցեր, վասն պատուական Արեան Քո՝ եւ վասն արդարութեան սիրելեաց Քոց՝ դարձ առ մեզ. եւ ողորմութեամբ Քով մեծաւ ողորմեաց մեզ. եւ ուրախացո զմեզ՝ որպէս ասացեր առ Եսայեաւ, Լսեցո՛ր եւ մեզ զայն երանաւետ ձայնն թէ՛

- «**Լուսաւորեաց Եկեղեցիդ Հայաստանեայց եւ ուրախ լեր, զի հասեալ է լոյս Քո: Ահաւասիկ ես դարձուցանեմ ի քեզ զխաղաղութիւն իբրեւ զգետ. եւ զմանկունս Քո ի հեռաստանէ ի վերայ ուսոց իւրեանց բարձեալ բերիցեն»:**

Յիրաւի՛ այդպիսի ամենակարող Աստուծոյ ողորմութեան եմք մնացեալ ապաստան, ողորմած Աստուած:

Ուրեմն հաշտեա՛ց ընդ մնացորդաց ժողովրդեան Քո. փրկեա՛ զմեզ մեծաւ սքանչելեօք. ժողովեա՛ ի գոգ սիրոյդ եւ մխիթարեա՛ ի փառս անուան Քո սրբոյ, որ կոչեցեալ է ի վերայ մեր:

Այլ եւ աղաչեմ զքեզ, Տէր իմ եւ Աստուած իմ, վասն ամայացելոց եւ անշքացելոց վանօրէից եւ եկեղեցեաց մերոց : Լուր մեզ՝ ահա նեղեալ անձամբք աղաղակեմք:

Մի՛ յիշեր զմեղս մեր, որով բարկացուցար զՔեզ. այլ յիշեա՛ զսուրբսն Քո՝ յորոց անուն կառուցան եկեղեցիք մեր: Զսուրբ եւ զմաքուր նշխարս նոցա, որք ամփոփեալք են ի նոսա. եւ զսրբութիւնսն՝ յորոց վերայ անուն Քո կոչեցեալ է:

Եւ ոչ եթէ վասն արդարութեան իմոյ արկանեմ զայս աղերս առաջի Քո, այլ վասն բազում գթութեան Քո եւ վասն սիրոյ սիրելեաց սրբոց եւ սրբութեանց Քոց:

Ուրեմն աղաչեմ զՔեզ, ողորմած եւ գթած Աստուած, վասն անհուն ողորմութեան Քո, ի սէր սրբոց Եկեղեցեաց եւ սրբութեանց Քոց, բարեխօսութեամբ Քեզ հաճոյացելոց սրբոցն Քոց, եւ միջնորդութեամբ նոցին չարչարանացն, պատուական արեանն, եւ մաքուր նշխարաց եւ դամբարանացն՝ ողորմեա՛ եւ այց արա: Որպէս տառապեցուցեր բարկութեամբդ, նմանապէս բժշկեա՛ եւ մխիթարեա՛ ողորմութեամբդ: Զի որպէս տեսին աչք մեր զամայութիւն եւ զապականութիւն նոցին վասն մեղաց մերոց, տո՛ւր մեզ տեսանել վերստին զվերանորոգութիւն եւ զպայծառութիւն նոցին վասն սիրելեաց սրբոց քոց:

Եւ որպէս հատան եւ լռեցին ձայնք օրհնութեանցն եւ փառաբանութեանց ի նոցանէ, արա զի վերստին զօրացին եւ բարձրացին ի փառս անուան Քո. զի ծանիցեն ամենեքեան թէ՛ կոչեցեալ է անուն Քո ի վերայ մեր եւ նոցա: Զորս եւ մեր տեսանելով վերառաքեսցուք փառս եւ գոհութիւնս ի յերկինս Քեզ ընդ Շօր եւ ընդ Սրբոյ Հոգւոյդ, այժմ եւ միշտ եւ յաւիտեանս յաւիտենից. Ամէն:

«**ԳԱՆՉԱՐԱՆ ԱՂՕԹԻՑ**»

ՅԵՐՈՒՍԱԿԷՄ



www.ghevondvardapet.com



ՈՂԲԵՐԳԱԿԱՆՔ ՎԱՍՆ ՀԱՄԱՅՆ ԱԶԳԻ ԵՒ ԵԿԵՂԵՑԱԿԱՆԱՑ ՀԱՅՈՑ

Եւ արդ Տէր իմ եւ Աստուած իմ Յիսուս Քրիստոս, ես ամենապիսալ եւ բազում չարեօք եւ անօրէնութեամբ լցեալ ծառայս Քո, արդեն յերկիր խոնարհեալ՝ կորագլուխ անձամբ եւ մեծակական ողբով ի խորոց սրտէ հառաչեմ առ ամենագթած Աստուածդ իմ, եւ աղաչեմ վասն ողորմելի եւ անտերունջ ազգիս մերոյ. աղաղակեմ առ Քեզ՝ ո՛վ ողորմելեաց Ողորմած, անտիրացելոց Տէր, անճարելոց ճար, անօգնականից Օգնական, անյուսից Յոյս եւ Ապաւէն, նեղելոց եւ վշտացելոց հանգիստ եւ մխիթարութիւն: Գոչեմ առ քեզ մեծաւ թախանձանօք. բա՛ց Տէր, զաչս Քո, եւ տե՛ս զողորմելիութիւն մեր. տե՛ս զփոքրիկ հօտս Քո, թէ ո՞րպէս եմք ցրուեալ եւ տարագրեցեալ ընդ ամենայն երկիր եւ մատնեալ ի ձեռս օտարաց տէրանց եւ թշնամեաց, զրկեալ ի սեպհական բնակութեանց եւ ի Հայրենեաց մերոց:

Ո՛հ, զի եմք որպէս զնաւ դեկաբեկ, տատանեալք յալիս ծովու առանց ղեկավարի, եւ որպէս ոչխարք մոլորեալք ի յանապատի առանց հովուի. եւ ո՛չ ունիմք զՄովսէս ` որ առաջնորդեցէ. եւ ո՛չ ունիմք զՅեսու՝ որ ընդդէմ թշնամեաց կացցէ. եւ ո՛չ ունիմք զԴաւիթ՝ որ վասն մեր հաճոյական պատարագս մատուցէ Քեզ, եւ զսուր բարկութեան Քո յետս դարձուցէ: Եւ ո՛չ ունիմք զՄարգարէ, զԹագաւոր եւ զԱռաջնորդ, եւ ո՛չ զօգնութիւն իմն յումեքէ:

Իշխանք մեր եւ ազատագնեայք մերկացեալ յիշխանութեանց եւ ընչից՝ եւ անկեալք ընդ իշխանութեամբ այլոց ծառայեն թշուառութեամբ:

Հասարակ ժողովուրդքս գրաւեալք ի ներքոյ ծանր լծոյ եւ հարկի այլազանց՝ հագիւ թէ հայթայթանօք գտանեմք զապրուստ կենաց մերոց. եւ զսերմանեալսն եւ զվաստակս մեր այլք ուտեն եւ վայելեն:

Եկեղեցիք վայելչագեղք եւ վանօրայք պայծառաշէնք՝ որք յանուն Քո եւ ի յիշատակ սրբոց Քոց սիրելեաց կառուցան, Հոգւոյդ Սրբոյ օծմամբն կնքեցան, եւ ամենայաղթ Խաչիդ նշանան պսակեցան, յորս մատչիր պատարագ Գառն Աստուծոյ ի փրկութիւն աշխարհի, յորս կատարէին սրբագործ եւ հոգեկեցոյց խորհուրդք Քո, յորոց ելանէին եւ վերառաքէին առ քեզ ձայնք օրհնութեանց եւ փառաբանութեանց, բուրմունք հոգեւորականք, նուէրք հաճոյականք եւ աղօթք հաշտարարք, ահա՛ ըստ մեծի մասին ամայացեալք եւ ապականեալք՝ գողոց եւ զազանաց օթարան են եղեալք:

Յիրաւի ձգեաց թշնամին զձեռն ի ցանկալիսն Քո: Մտին հեթանոսք ի ժառանգութիւնս Քո եւ պղծեցին զսուրբ տաճարս

Քո: Սրահք եւ սրբութիւնք նոցա դարձան յապականութիւն: Սուգ առին ճանապարհք նոցա: Հատան երթելեկք տօնից տարեկանաց նոցա: Լռեցին ի նոցանէ ձայնք օրհնութեանց եւ փառաբանութեանց: Գազանք եւ յափշտակողք մուտ եւ ել առնեն ի նոսա: Սքանչելարար դամբարանք եւ բժշկարար նշխարք սրբոց՝ որք ի նոսա, կոխան եղեն ոտից անսրբոց եւ պղծոց: Քահանայք եւ պաշտօնեայք նոցա հալածեալք: Ուստի եղաք մեք մնացողքս նախատինք դրացեաց եւ այսն կատականաց թշնամեաց մերոց:

Արդ՝ այս ամենայն եկին եւ զան ի վերայ մեր վասն մեղաց մերոց: Քանզի մեք մեղաք, անօրինեցաք եւ ապստամբեցաք ի Քէն. վասն այսորիկ եւ Դու թոյլ ետուր այս ամենայն չարեաց գալ ի վերայ մեր եւ տիրել մեզ, եւ մատնել զմեզ ի ձեռս թշնամեաց՝ տէրանց ապստամբողաց. որպէս ահա եմք տառապեալք ի վերայ ամենայն երկրի այսօր վասն մեղաց մերոց: Ուրեմն Աստուծոյդ մերում արդարութիւն, եւ ամօթ երեսաց մերոց:

Արդ՝ այժմ առ ո՛վ դիմեսցուք, ո՛վ Աստուած մեր, եւ ո՛ւմ պատմեսցուք զցաւս մեր. եթէ ոչ Քեզ բարկացելոյդ. որ որպէս արդարութեամբ խրատեցեր եւ հարեր զմեզ, կարող ես եւ Դու ողորմութեամբդ անդրէն վերստին բժշկել եւ մխիթարել:

Վասն որոյ՝ ահա անկանիմ առաջի անոխակալիդ Աստուծոյ եւ ըստ անառակին գոչեմ. մեղաք յերկինս եւ առաջի Քո. մեղաք ստեղծողիդ մերոյ. մեղաք բարերարիդ մերոյ եւ Աստուծոյ:

Աղաչեմ զքեզ, անոխակալ Տէր Աստուած, դարձի՛ր ի բարկութենէ Քումմէ եւ անցո ի մէնջ

զցասումն Քո. մի՛ յիշեր զմեղս մեր զառաջինս, վաղվաղեցէ առ մեզ ողորմութիւն Քո, զի աղքատացաք յոյժ: Զարթի՛ր, Տէր, զարթի՛ր. արի՛ եւ մի՛ մերժեր զմեզ իսպառ:

Մի՛ մոռանար զաղքատութիւն եւ զնեղութիւնս մեր: Արի՛, Տէր, օգնեա՛ մեզ եւ փրկեա զմեզ վասն անուան Քո, որ կոչեցեալ է ի վերայ մեր: Մի՛ մատներ զմեզ իսպառ վասն անուան Քո. Մի՛ ցրեր զուխտս քո. եւ մի ի բացեայ առներ զողորմութիւնս Քո ի մէնջ: Զի Դու միայն ես Տէր մեր եւ Թագաւոր. Դու միայն ես Փրկիչ մեր եւ օգնական. Դու միայն ես ապաւէն մեր եւ յոյս: Զի բաց ի Քէն զայլ ոք ո՛չ գիտեմք, եւ զանուն քո կարդամք հանապազ: Տե՛ս զտառապանս ազգիս մերոյ. հաս յօգնութիւն եւ այց արա:

Եւ որպէս գթայիր հնոյ ժողովրդեանն՝ վասն Աբրահամու, Իսահակայ, Յակովբայ եւ վասն Դաւթի ծառայից քոց. գթա՛ եւ այժմ նորոյ ժողովրդեանդ եւ փոքու հօտիդ, վասն սրբուհւոյ Աստուածածնի՝ անարատ ծնողի Քո, սրբոյն Յովհաննու Կարապետին եւ Մկրտչին Քո. սրբոյն Ստեփաննոսի նախավկային Քո. սրբոց Առաքելոցն եւ Մարգարէից Քոց. եւ սրբոց Առաքելոցն եւ յատուկ Լուսաւորչացն մերոց՝ Թաղէոսի եւ Բարդուղիմէոսի, եւ սրբոյն Գրիգորի բազմաչարչար վկային Քո. եւ նորին Որդւոց եւ Թոռանց՝ ընտրելոց ծառայից Քոց. եւ սրբոց Հռիփսիմեանց եւ Գայիանեանց՝ յաղթող վկայիցն Քոց: Եւ բարեխօսութեամբ սրբոց Հայրապետաց եւ Վարդապետաց, Ճգնաւորաց, Մարտիրոսաց, Կուսանաց, եւ ամենայն սրբոց քոց հնոց եւ նորոց՝ յայտից եւ անյայտից:

Այլ եւ բարեխօսութեամբ սրբոց Քոց երկնաւորացո՛ր՝ Գաբրիէլի եւ Միքայէլի եւ ամենայն անմարմնական դասուցո: